

Awe ta entregamento di lista di candidatonan di partidonan politico

Awe for di 9or di mainta te cu 4or di atardi, 12 partido politico ta bay haci entrega di nan lista di candidatonan caminda ya caba algun di nan a anuncia cu ta bay haci nan parada.

Pa esaki, Consejo electoral a informa cu pa sigura un proceso organisa y transparente, e partidonan politico a ricibi e oportunidad pa participa den un loting pa stipula e orario di entregamento di e lista di candidatonan di partidonan politico pa cu e eleccion di parlamento dia 6 di december 2024.

Na Hoofdstembureau, Schoolstraat #2 ta bay entrega e lista di candidatonan di partidonan politico digi-

talmente of personalmente door di e apoderado of e apoderado suplente di e partido politico registra na Consejo Electoral. Tambe por ta presente, un candidato pa e eleccion of e lider di e partido politico.

Pa loke ta trata partidonan mas grandi, MEP a publica riba su rednan social cu “Ban join Lider di MEP Evelyn Wever-Croes y partido MEP pa entrega e lista victorioso diabierna dia 18 di october pa 1.30 di atardi. Bisti geel y uni na e movecion.”

Partido AVP a anuncia cu nan lo entrega e lista “di victoria,” nan ta bay sali for di Cas di partido na Playa y pa 2:00 di atardi nan mester ta na

Hoofdstembureau.

Un di e partidonan nobo, FUTURO, riba su rednan social a señala cu “Ban Nos TUR! Entrega lista. Diabierna 18 di october, 2024 Topa nos 2:00 atardi na Futuro Office (Rotonde di Paradera). Nos ta warda boso TUR!”

Di otro banda, partidonan politico cu no a logra gana un asiento durante e eleccion ultimo na 2021 mester ricibi sosten di nan lista politico cu 586 persona cual ta 1% di e votonan valido di e eleccion anterior esta 58,610 voto.

Firma pa sosten di lista por wordo haci entre 21 di October te cu 29 di October 2024.

Orario Stipula	Partido
09:00 AM	Partido HTC (HTC)
09:30 AM	
10:00 AM	Cristiannan Uni Reforzando Potencial di Aruba (CURPA)
10:30 AM	Movimiento Arubano Soberano (MAS)
11:00 AM	Movimiento Indigena Arubano (MIA)
11:30 AM	Union Patriotico Progresista (UPP)
12:00 PM	Partido Patriotico di Aruba (PPA)
01:00 PM	RAIZ
01:30 PM	Movimiento Electoral di Pueblo (MEP)
02:00 PM	Arubaanse Volkspartij / Christen Democraten Aruba (AVP)
02:30 PM	Red Democratico (RED)
03:00 PM	Accion 21 (ACCION 21)
03:30 PM	FUTURO (FUTURO)

Ciudadanonan preocupa:

A kita varios mashin di ehercicio na Linear Park

Na mesa di redaccion di Bon Dia Aruba a yega informacion di lectornan cu ta hopi preocupa pa loke ta trata e mal estado di varios mashin di haci ehercicio cu ta ubica riba Linear Park. Nan ta cuestiona pakico gobierno no a haci e mantencion debido na e mashinnan aki, cu hopi ciudadano ta haci uso di nan.

El a bira casi un custumber pa hopi ciudadano, den intento di mantene un estilo di bida saludabel y haci movecion, di cana riba e ruta di Linear Park y alabes haci uso di e mashinnan di haci ehercicio cu tin poni riba e mesun ruta aki.

Pero recientemente a sali na cla cu e mashinnan aki ta den hopi mal estado y algun no por wordo usa pa motibo cu por ta peligroso pa personanan na momento cu haci uso di dje. Lectornan cu a expresa nan preocupacion ta puntra pakico gobierno no a realisa mantencion riba e mashinnan aki enbes di laga nan bay perdi.

Gobierno di Aruba demisionario na mas di un ocasion a ratifica nan compromiso pa yuda ciudadanonan hiba un estilo di bida mas saludabel. A inicia diferente campaña pa mehora estilo di bida, a habri e Healthy Lifestyle Center, a lansa varios proyecto y/programa tambe den e mesun liña aki y recientemente a organisa e Expo Salud. Tur es-



aki pa enfatisa e importancia di un estilo di bida saludabel.

Pero di otro banda, no a duna atencion y mantencion na e mashinnan aki na Linear Park, cu tin como meta stimula ciudadanonan, specialmente esnan cu no tin facilidad pa paga miembresia na un gym, pa haci actividad fisico y mantene un estilo di bida saludabel.

Na mesun momento ciudadanonan ta cuestiona pakico, si gobierno ta papia di un surplus y un economia cu a recupera significativamente, miho di loke a spera, no ta inverti den mantencion di un proyecto ya caba existente y

cu hopi ciudadano a custuma di haci uso di dje.

Ya caba a kita algun di e mashinnan aki cu tabata den mal estado y no a remplasa nan cu otro mashinnan tampoco. No ta conoci si ta bay bin otro mashinnan of cuanto tempo lo dura prome cu mashinnan nobo.

Reportero di Bon Dia Aruba a tuma contacto cu un representante di DOW pa asina puntra pa ki motibo no a duna mantencion na e mashinnan aki, si ta bay kita nan of cambia nan. Pero no a logra ricibi un contesta te na momento di ciere di edicion.

